

四明叢書

張宗祥



杲堂文續鈔卷三目

序

送萬季野北上序

送董吳仲授經會稽序

送庭南禪師至淮上序

送天童西堂慰弘大師住杭州佛日禪寺序

贈澹園居士序

修紹興府學序

書

答黃先生書

奉答黃先生書

答鄧孝威先生書

與萬貞一書

答筇公書

與山翁和尚書

答溧陽周二安書

再答周二安書

記

知年堂記

邱氏草堂古樹記

傳

董天鑑先生傳

銘

第五舅父邵希梁先生墓誌銘

董正先生墓誌銘

張君四岑墓誌銘

贈都察院右僉都御史玄石楊公一門合葬墓誌

銘

邱生墓誌銘

文

祭先儀部文

祭董次公先生文

祭范玉壘先生文

祭董在中文

哭亡女美蘭文

再告美蘭文

杲堂文續鈔卷三

明甬上李鄴嗣撰

送萬季野北上序

吾友萬季野兄弟八人一時比之西豪里亂後諸萬並居西皋丙舍惟季野獨依婦家城東其所居甚貧敝褐塞徧四壁不能立與余家相去數百步余齋居在曲巷中竹長柳深車馬希至因延季野與同居使兒子瞰從受經季野喜從郡中耆舊諸長者游尤善龍獎後輩余家苦無書季野徧從里中大家借得異本數童子往來

道中一時諸君欲叩經史疑義則造季野欲論古文詞則造余余兩人相對時各欣然詠懷一宮一商其聲出金石如是者遂五年方是時余兩人岸然自置並在雲霞之表俯視世間一切躍馬食梁肉嚙嚇富貴中人其相去碌碌誠不可丈尺也而季野之名遂已日聞於天下初黎洲黃先生嘗謂余言季野之才須且養之使其學益大充始一湧而出吾家義山有言未嘗衣袖文章謁人求知必待其恐不得識其面恐不得讀其書然後乃出今季野學既大充矣海內惟恐不識其面矣惟恐

不讀其書矣吾卽有修竹一庭蓬蒿遮其三逕豈能使
季野與余久處此中耶昔鄭次都能招郅君章弋陽同
隱未嘗阻其喟然而別也襄陽龐德公使孔明獨拜牀
下未嘗止其隆中一出也此亦事勢使然矣今春季野
旣別余就館於崑山甫數月季野復歸治行將北上造
余而別余因出韭黍常供與驩敘竟日復念季野此行
爲計歸重聚卽季野不得自期況季野所主爲史閣巨
公初領制作之重其推轂季野尤甚卽從此季野出處
之事且有操之者矣使余亦從諸君津津計季野此行

譬有一嫠婦盛稱東鄰嫁女乘輅得無爲識者掩口但
余與季野交最深知季野卽負用世才其素襟良不易
吾東齋一榻當仍久懸以待孺子終不若君章諸葛君
一出而後迴憶弋陽魚釣長嘯作梁甫吟遂茫如隔世
也

送董吳仲授經會稽序

姚江黃忠端公初從師甬上客於董氏黎洲先生因與
天鑑先生兄弟有世好旣而先生年德日盛非海內人
譽不敢造門及遭亂以來交游零謝惟與吾鄉陸文虎

萬姓及天鑑請先生爲歲暮之交泛舟寒寂時冒風
而至十年以來青藜諸君子始盡受經於先生之門彬
彬極盛諸君子執禮甚恭每有所誦法必稱吾師黎洲
先生一時學者始知師弟子有所授受與俗學絕不同
而諸賢中惟萬董兩先生後人爲多是則黃先生之家
學發源於甬上其論交中定於甬上其及門晚盛於甬
上而萬氏董氏三世並參錯其間此兩家所以爲有本
之學也昔吾友燕人梁仲木來客甬上萬董諸兄弟俱
以通家子上謁旣造席四座盡滿並極風儀仲木謂余

曰今日見萬董子弟龍駒鳳雛應接不暇可謂極門風之盛然此兩家奉庭訓甚謹門中孝友不愧古人往時余見在中吳仲兄弟居天鑑先生喪哭泣盡哀常居豐儉必共內外無間言俱足爲士族法而諸董中獨吳仲爲人丰采銳發卓犖自喜可爲磊砢而英多與之交心矚目開夫學者卽稟中材但使少承家訓得事天下有道所交從盡賢者旣得弘益亦可望有成況吳仲軼倫之才好學不倦而更以數者輔之富有日新豈復可量此真吾之所畏也今歲吳仲將與萬季野俱授經於會

稽凡吾所以屬吳仲者已具見送季野序中可不更及
獨是會稽霸國其臥冰苦竹餘風千載可見惟吾吳仲
負慷慨之氣憑覽歷歷當自隱然不平昔余有會稽懷
古詩八章俯仰之際略見蒼涼吳仲至越中必有以和
我矣

送庭南禪師至淮上序

自余尙幼六七歲從先公至天童方在盛平先公所從
賓客車騎甚多時密祖初立梵筴海內震動惟大殿新
搆余從先公後望見密祖狀貌如古佛及密祖棄世塔

院成諸大弟子畢集見其人率俱魁梧偉岸如龍驤虎視余年少不敢與款接此天童第一世之盛甲於江左名藍者也其後山翁老人首繼法席老人惟喜延納值喪亂之後凡避世者多銷名變服竄於釋門余亦年壯失職樂從老人游每造方丈良久出坐記室四顧諸禪侶輒疑其中有異人隱而不余告也此天童第二世雖亂在世間而世出之盛翻過於前日者也至於今爲獻堂和上和上宿領袖人外與吾輩交諸名士共稱爲獻堂先生其來主天童所從一記室明介慰弘俱奇士和

尙旣與敘契闊甚驩兩記室並極傾倒而寒泉子亦近
住若耶杖笠時至必造余此天童第三世之盛而余與
論交則益深矣固追憶自余童稚至天童復五十餘年
所歷天荒海老人世變遷真有如泡電而天童堂構宛
然密祖所手植松杉蒼幹森森如數百年物余與其子
孫曾三世敘交去歲歉堂和上六十今歲寒泉子六十
來歲余亦六十余之髮髻者日稀齒髻者日落雖幸在
遲暮吾三人尙得風流往來而殊不知老之旣至矣故
余每接天童後輩必勉其學問使密祖第四世有人去

歲慰公住佛日余序而送之三吳諸君子俱喜余言適西堂庭南禪師將返淮上諸同門以詩送行屬余序其首余謂庭公道風與慰老適等因爲述天童三世之盛以勉其行知淮上諸君子亦必聞余言而喜也

送天童西堂慰弘大師住杭州佛日禪寺序

自孔子而後諸弟子散處列國子貢在齊子夏在西河澹臺子羽在楚子張在陳各以其學相傳授爲當世師而子游子則歸於吳中此方風氣遂漸開其後衣冠禮樂常爲正朔所在而齊魯彬彬之盛遂盡歸於南國俱

子游子倡之也而孔門文學已早以言氏爲舉首若禪
宗自釋迦以正法眼藏付大弟子迦葉屬其流布無令
斷絕至菩提達摩浮海而來更爲中國首闢宗門妙旨
闕所未有正不知彼土自二十八世而後仍展轉相授
否而此間則直以大祖接初祖爲二世遞傳至今於是
如來妙心正法悉流入中華稱爲極盛然則釋氏之有
西來菩提猶吾孔門之有子游子也蓋弟子闡揚師教
至能爲開闢鴻濛其甚重若此循及宋元以後禪宗一
燈僅存微燭至近世天童密祖而法炬復熾號曰季興

余爲稚子時尙及見密祖狀貌至南山塔成諸大弟子
畢集其人俱魁奇英傑足可敬仰而論者更以山翁牧
雲二公爲第一流及山翁老人繼席高自標置一時磨
鳳萃其門而論者更以漱堂寒泉子二公爲第一流今
漱堂和上自吳中來繼兩世席未至吾友董岳堂手札
示余曰漱公爲太白山主足慰宿懷其所從二門人俱釋
林奇士也余心識之一謂明介禪師一謂今西堂慰弘
禪師是也介公淵靜慰公高朗余得交此兩人各極流
連不知老至自良友早謝曇隆諫戒余因與慰公交益